



Broj/Број: 02,03,03/11-05-526/07  
Sarajevo/Сарајево: 11.12.2007.godine

**IZVJEŠTAJ  
O UČEŠĆU STALNE DELEGACIJE PSBiH U PSOSCE-A U NADGLEDANJU IZBORA U RUSIJI,  
MOSKVA, 2.12.2007.**

Članovi Stalne delegacije PSBiH u PSOSCE-a: Branko Zrno, Šemsudin Mehmedović i Drago Ljubičić, i sekretar Stalne delegacije Jelena Rajaković, učestvovali su u procesu nadgledanja parlamentarnih izbora u Rusiji, održanih 2. 12. 2007.

Na teritoriji Rusije u posmatranju izbora učestvovalo je 106 stranih posmatrača.

Nakon što je ODIHR ( Ured za demokratske institucije i ljudska prava) otkazao učešće u ovom procesu bez konsultacija s Parlamentarnom skupštinom OSCE-a, PSOSCE-a nastavila je dogovore s ruskim vlastima o učešću u procesu nadgledanja i delegirala svoja 42 člana.

Parlamentarna skupština Vijeća Evrope također je učestvovala sa svoja 64 člana.

U petak, **30.11.2007.**, za strane posmatrače organizirani su sastanci u Dumi, na kojima su se obratili predstavnici svih stranaka koje su učestvovala na izborima.

Sastanak je otvorila L.J.K. Sliska, prvi zamjenik predsjednika Ruske dume, nakon čega je predsjednik Centralne izborne komisije V.E. Čurov objasnio principe izbora u Rusiji i odgovarao na pitanja prisutnih.

Većina pitanja odnosila se na tretman opozicionih stranaka od strane aktuelne vlasti u predizbornom periodu, nejednaku zastupljenost u medijima i favoriziranje stranke Ujedinjena Rusija na čijem čelu je Vladimir Putin.

Čurov je odbacio ove optužbe i rekao kako je upravo opozicija bila favorizirana i finansirana iz inozemstva.

Nakon višesatne debate o tom pitanju, prisutnima se obratio V.N Bogomilov, prvi zamjenik frakcije Ujedinjena Rusija. On je kao glavne ciljeve te stranke istakao političku stabilnost i poštivanje ustavnog poretka, nastavak ekonomskog rasta Rusije, poboljšanje životnog standarda i konsolidaciju odbrambenih kapaciteta i sigurnosti zemlje.

Genadij Zjuganov, lider Komunističke partije ( KPRF), koja je svoju platformu zasnovala na 90-godišnjici Oktobarske revolucije i socijalnoj reformi, kao glavne ciljeve istakao je: nacionalizaciju naftnog, energetskog i industrijskog sektora., kontrolu cijena plina, transporta, telekomunikacija, hrane i lijekova.

On je tokom obraćanja skrenuo pažnju na nejednak tretman stranaka u predizbornom periodu i naglasio da je zastupljenost Ujedinjene Rusije u medijima bila 63% a Komunističke partije 6% .

G.N. Seljeznev, kopredsjednik frakcije Patrioti Rusije, koja je nastala kao krilo koje se izdvojilo iz Komunističke partije i čija je politička platforma veoma slična platformi KP, također je optužio Ujedinjenu Rusiju da su mediji potpuno pod njenom kontrolom i da se predizborna kampanja te stranke finansirala na nedozvoljen način.

Vladimir Žirinovski, lider Liberalno-demokratske partije Rusije ( LDPR ) kao njene osnovne pravce djelovanja istakao je: stvaranje snažne ruske države, ponovno ujedinjenje zamalja bivšeg SSSR-a, red i zakon, stvaranje socijalno orijentiranog društva i stabilan standard za sve Ruse.

Nakon njega, prisutnima su se obratili i A.M. Babakov, šef frakcije Rodina, G.M. Mihajleva, član Biroa frakcije Jablako, i B.E. Nemcov, član Federalnog političkog savjeta.

U subotu, **1.12.2007.**, strani posmatrači dobili su uputstva za posmatranje izbora i raspoređeni u pet oblasti: Moskva, Sankt-Petersburg, Vladivostok, Nižni Novrogod i Rostov na Donu.

Delegacija PSBiH raspoređena je na birališta u Moskvi: Branko Zrno i Šemsudin Mehmedović – centar Moskve, Drago Ljubičić i Jelena Rajaković -jugoistočna oblast Moskve.

**2. 12. 2007., u 8 sati po lokalnom vremenu, otvorena su birališta na kojima je ukupno 109 miliona birača biralo 450 poslanika Ruske dume, a izborni prag iznosio je 7 %.**

Na biralištima ( ukupno 22 biračka mjesta) koja su nadgledali članovi delegacije PSBiH uočeno je sljedeće:  
- **Branko Zrno i Drago Ljubičić** naveli su da nije bilo nepravilnosti na biračkim mjestima. Primijećeno je generalno odsustvo nevladinog sektora u posmatranju izbora ali su kao posmatrači bili prisutni predstavnici političkih stranaka.

- **Šemsudin Mehmedović** naveo je da na mjestima koja je posjetio nije bilo posmatrača iz nevladinog sektora, na pojedinim mjestima bili su prisutni posmatrači iz političkih stranaka (uglavnom Ujedinjena Rusija i ponegdje Komunistička partija) a na ostalima uopće nije bilo drugih posmatrača.

On je istakao da je na biralištima vladala gužva, buka te da nije bila osigurana tajnost glasanja.

Svoja zapažanja članovi delegacije PSBiH, kao i podatke prikupljene na biralištima, unijeli su u posmatračke formulare koji su predati Sekretarijatu PSOSCE-a.

Nakon izbora, **3.12.2007.**, održan je sastanak stranih posmatrača (PSOSCE i PSVE), na kojem je zaključeno da su generalno izbori bili dobro organizirani i da su uočena znatna tehnička poboljšanja. Međutim, istaknuto je da su se izbori održali u atmosferi koja je ozbiljno ograničavala političko takmičenje, da su često bili zloupotrebjavani administrativni resursi, da su mediji favorizirali samo jednu stranku, te da je uopće ometan politički pluralizam.

Misija PSOSCE-a zaključila je da je ostvarena odlična saradnja s ruskim vlastima i zvaničnicima Centralne izborne komisije, te da nije bilo nikakvih ograničenja prema raspoređivanju posmatrača bilo gdje u zemlji. Parlamentarcima su također bili organizirani susreti s političkim liderima svih stranaka te predsjednikom i predstavnicima Izborne komisije.

Ruske opozicione stranke te Organizacija za nadzor izbora "GOLOS" objavili su u medijima da su utvrđena brojna kršenja izbornih pravila.

Centralna izborna komisija Rusije odbacila je ove primjedbe kao neosnovane navodeći da njima nisu stigle konkretne pritužbe u pisanoj formi o narušavanju izbornog procesa, te da pojedinačni propusti koji su uočeni na pojedinim izbornim mjestima nisu mogli uticati na konačan ishod izbora.

Prema objavljenima rezultatima, na ruskim parlamentarnim izborima pobijedila je Ujedinjena Rusija, koju je predvodio Vladimir Putin sa 63,3 % glasova, slijedi Komunistička partija sa osvojenih 11,7 % glasova, Liberalno-demokratska stranka Rusije sa 8,8 %, Poštena Rusija sa 8 %, Agrarna stranka sa 2,5%, Jablako sa 1,6 %, te Građanska snaga sa 1,1 % i SPS sa 1 %.

Izveštaj pripremila

sekretar Stalne delegacije PSBiH u PSOSCE-a  
Jelena Rajaković

- **Napomena: Izveštaj odobrio šef Stalne delegacije PSBiH u PSOSCE Branko Zrno**

Dostaviti:

- Kolegiju Predstavničkog doma
- Kolegiju Doma naroda
- Komisiji za vanjske poslove Predstavničkog doma
- Komisiji za vanjsku i trgovinsku politiku Doma naroda
- članovima delegacije PSBiH u PSOSCE

Kopija: Ministarstvo vanjskih poslova BiH